

عمر عفيفي

عشان ما تنضربش على قفاك !!




مدبولي الصغير



عشان ما تنضربش على قفاك



عصير عفيفي



عصير عفيفي

عمر عفيفي

بسم الله الرحمن الرحيم

عشان متنضربش على قفاك

~إمتي يدخل الظابط بيتك من غير إذن وميكونش غلطان؟~

س: إيه الحالات اللي ممكن الظباط يدخلوا فيها البيوت من غير إذن تفتيش من النيابة؟ ج: من حق الشرطة يدخلوا البيوت لو حد من أصحاب البيت طلب منهم المساعدة أو النجدة من داخل البيت.

س: زي إيه الحالات دي؟ ج: مثلا لو كان فيه حريق أو تسرب غاز أو بوتاجاز من بيت أو شق.

س: من حق ظباط المطافي أو المرور يعملوا قضايا للناس؟ ج: أيوه من حقهم لو لقوا حاجة صدفه وهم بيقوموا بشغلهم «مخدرات، سلاح مثلا» يمسكوها ويعملوا بيها محضر تلبس ويسلموه لأقرب قسم شرطة.

س: وإيه حالات الضرورة الأخرى؟ ج: يجوز للشرطة اللي ليهم سلطة الضبطية دخول البيوت لو كانوا بيتعقبوا شخص له أمر ضبط وإحضار من النيابة أو المحكمة ومطلوب القبض عليه

~البيوت لها حرمة وتفتيشها له قواعد وأسس.. ولازم تعرفها~

س : إمتي تطلع الإجراء باطل وتتهم الظابط في قضية تزوير محضر وتلفيق اتهام؟ للبيوت حُرُمات، ولا يجوز لأي حد إنه يدخل بيت أو يفتشه إلا بأمر من النيابة العامة أو من المحكمة المختصة، ويكون أمر التفتيش مسبب، وأي حد يدخل بيت أو يفتشه بدون أمر قضائي يبقى ارتكب جريمة انتهاك حرمة مسكن.

س: أعمل إيه لو كنت في بيتي ولقيت حد من الشرطة خبط علي الباب وعاوز يفتش بيتي؟ ج: لازم تتمالك نفسك ومتخفش وتتحقق الأول من شخصيته وتشوف كارنيهه وتعرف هو مين وبishtغل إيه وفين وتطلب منه يوريك أمر التفتيش الأول قبل ما تدّخله بيتك عشان يفتشه.

س: إيه هو البيت؟ ج: للبيوت حرمة، والبيت هو كل مكان خاص بيقم فيه الإنسان فترة من الزمن طويلة كانت أو قصيرة بصفة دائمة أو مؤقتة، وأي حاجة تتبع البيت وملحقة بيه تعتبر بيت وليها نفس حرمة البيت، ولو كان ملحق بالبيت حديقة أو مخزن.

س: هل شقة المصيف اللي بيقم فيها الشخص فترة بسيطة من الوقت كل سنة تعتبر بيت ولها نفس حرمة البيوت؟ ج: شقة المصيف تعتبر بيت ولها نفس حرمة البيت.

س: إيه هي الحالات اللي ممكن يفتشوا فيها شقتي أو بيتي؟ ج: لازم يكون معاهم إذن تفتيش مسبب من النيابة العامة أو المحكمة المختصة.

س: أعمل إيه لو حد حاول يفتش بيتي بالعافية من غير أمر بالتفتيش؟ ج: تزعم وتلم عليه الجيران والناس اللي ماشيه في الشارع تشهدهم عليه بأنه انتهك حرمة بيتك وارتكب جريمة انتهاك حرمة مسكنك وتعمله محضر علطول وتطلب النجدة علي ١٢٢ عشان تثبت حالة.

س: أعمل إيه لو حد طلب مني إنه يفتش بيتي ومكنش معاه إذن بالتفتيش من النيابة وأخرجني؟ ج: لازم ترفض لأنك لو وافقت علي إنه يفتشك يبقى سقط حقك في الرفض وتبقى إديته الحق في تفتيشك برضاك، ولو فيه حاجة عندك ممنوعة «سلاح مش مترخص» مثلا تبقى حالة تلبس ومن حقه يقبض عليك ويبقى التفتيش سليم مادام وافقت عليه بمزاجك بدون إكراه أو ضرب أو تهديد.

س: لو كان الطابط معاه إذن تفتيش ومفتحتش له، من حقه يكسر الباب؟ ج: الطابط لو معاه إذن بالتفتيش من حقه يكسر الباب ويفتش حتي أوضة النوم.

س: بنسمع إن الطباط بيفتشوا وبعدين يطلعوا إذن التفتيش، نعمل إيه في الحالة دي؟ ج: تبعث علطول تلغرافات إن التفتيش تم في المكان الفلاني في الوقت الفلاني .

س: وهو ينفع يكون إذن التفتيش من النيابة شفوي أو في التليفون؟ ج: لازم يكون مكتوب ولازم يكون مكتوب فيه اسم وكيل النيابة اللي طلعه واسم المتهم أو المتهمين المطلوب تفتيشهم والسبب وتاريخ صدور الأمر، لكن فيه حالات نادرة جدا ممكن يكون الإذن شفوي.

س: وهو ممكن يصدر الأمر بالتفتيش لشخص والناس الموجودين معاه وقت التفتيش؟ ج: أيوه ممكن.

س: وهو ينفع التفتيش بالليل؟ ج: التفتيش ينفع في أي وقت بالليل أو بالنهار وحتى في أيام العيد والعطلات الرسمية.

س: ولو حد كان مستخبي في بيته وليه أمر ضبط وإحضار يقدروا يدخلوا البيت ويفتشوه بالقوة؟ ج: من حقهم يدخلوا البيت ويفتشوا علي المتهم لتنفيذ الضبط والإحضار عليه.

س: لو فيه أمر بالتفتيش لبيت من حقهم يفتشوا الناس اللي في البيت؟ ج: مش من حقهم يفتشوا كل الموجودين في البيت لكن من حقهم يأمرهم بعدم التحرك، لكن إذا قامت وقت تفتيش بيت المتهم دلائل قوية ضد شخص موجود في بيت المتهم اللي بيتفتش إنه مخبي معاه حاجه أو شيء يفيد في كشف الحقيقة يقدر وقتها اللي يفتش إنه يفتشه.

س: لو أنا مش في البيت أو في المكتب أو المحل يقدروا يفتشوه وأنا مش موجود؟ ج: المفروض يفتشوه في حضور حد من أهل بيتك أو من اللي شغالين عندك أو في حضور ٢ شهود من قرايبك أو جيرانك ويثبتوا ده في محضر، وممكن يفتشوه في غير وجودك أو وجود أي حد من الناس.

س: لو كان في البيت اللي بيتفتش مكاتب أو أظرف مختومة ومقفولة من حقهم فتحها وتفتيشها؟ ج: لو كان في البيت اللي بيتفتش أوراق مختومة ومقفولة بأي طريقة مش من حقهم فتحها وتفتيشها.

س: من حق اللي يفتش إنه يقطع المراتب والمخدرات عشان يفتش جواها؟ ج: لو كان اللي جاي بيدور علي حاجات مينفعش بالعقل إنها تكون في المراتب والمخدرات زي إنه يكون جاي يفتش علي مواشي مسروقه يبقى مش من حقه .

س: أعمل إيه لو كان في بيتي فلوس أو دهب وخايف تضيع وقت التفتيش؟ ج: تبلغ الطابط اللي بيفتش إن عندك فلوس ودهب وحاجات غالية وخايف عليها ويمكن تسلمها له في إيده قبل التفتيش علشان يسلمها لك ثاني بعد التفتيش لو كانت ملهاش علاقة بالشئ اللي مطلوب التفتيش عنه.

س: أعمل إيه لو اكتشفت بعد التفتيش إن فيه حاجات غالية اختفت من البيت؟ ج: تنزل تقابل مأمور القسم وتحكي له عن الموضوع وتصمم تعمل محضر في القسم بالحاجات اللي اختفت وتعمل شكوي لمفتش الداخلية فوراً.

س: هل من حق اللي بيفتش يكسر العفش وهو بيفتش البيت؟ ج: مش من حق حد يكسر أي عفش في البيت، ولو كسروا أي حاجة في بيتك يبقوا ارتكبوا جريمة إتلاف، ومن حقك تعمل لهم محضر إتلاف وتطلب النجدة تعالين الحاجات اللي أتلوها بدون سبب.

س: هل من حق اللي بيفتش يخدني ع القسم لو فتش وملقاش أي حاجة ممنوعة؟ ج: مش من حقه يخدك القسم طالما ملقاش عندك أي ممنوعات أو أي حاجة تعتبر جريمة.

~ الحالات اللي مكن يعملوا معاك فيها «تفتيش ذاتي» اقرأها كويس جداً ~

س: إزاي بيتم التفتيش الذاتي وبيفتشوا إيه بالظبط؟ ج: بيقوموا بتفتيش جسم المتهم وهدومه والحاجات اللي شايلها معاه والشنط اللي شايلها والحاجات اللي بيستعملها، زي عربيته الخاصة ومحلّه أو مكتبه الخاص.

س: أعمل إيه لو كنت ماشي في الشارع ومخبر من المباحث أو مندوب شرطة أو عسكري قاللي أنت مشتبّه فيك وعاوز أفتشك أو قاللي طلع اللي في جيوبك؟ ج: المخبر أو المندوب أو العسكري من حقه إنه يطلب بطاقتك «تحقيق شخصيتك» فقط لو كنت حطيت نفسك بمزاجك في موقف شك وريبة،؟

س: أعمل إيه لو كنت ماشي بالليل وكان فيه لجنة وفيها طابط وقفني وطلب بطاقتي وحاول يفتشني بنفسه أو حد من القوة اللي معاه، أو قاللي طلع اللي في جيوبك؟ ج: من حقهم يشوفوا بطاقتك فقط، وأرفض إن حد يفتشك، وكلمهم بكل حسم ورجولة وثقة، وعرفهم إنك عارف حقوقك كويس، ومش من حق حد يفتشك بدون إذن من النيابة أو المحكمة أو من غير سبب طالما مفيش عليك حكم ولا طالعك إذن تفتيش ولا ممسوك متلبس بجريمة.

س: تعمل إيه الشرطة لو المتهم بلغ حاجة ممنوعة «مخدرات مثلاً»؟ ج: لازم تعرضه علي طبيب مختص وهو اللي يثبت إذا كان مخبي حاجة جوه جسمه ولا لا، بعد ما يعملوا له غسيل معدة في مستشفى حكومي.

س: تعمل إيه الشرطة لو كان المتهم مخبي ممنوعات في مكان حساس من جسمه؟ ج: لازم الشرطة تعرضه علي طبيب شرعي .

س: أعمل إيه لو كان طالع لي إذن تفتيش وطلبوا مني أطلع هدومي الداخلية؟ ج: ترفض لأن مش من حق الشرطة تقلعك هدومك لأن ده يعتبر هتك لعرضك، ولازم تثبته وتعمل بيه محضر، وحاول يكون معاك شهود علي اللي حصلك.

س : لو اللي هابتفتش واحدة ست إيه اللي يبعدها عن هتك العرض والتحرش؟ مش شرط اللي تفتش الأنثي تكون ضابطة شرطة.. ممكن دكتورة أو ممرضة يمكن تفتيش الأنثي أمام الضابط لكن بدون خلع الهدوم لو كانت اللي هتفتش أنثي يبقى لازم اللي تفتشها أنثي زيها يندبها الضابط أو النيابة أو المحكمة اللي بتجري التفتيش.

س: أعمل إيه لو حد من الشرطة حاول يفتش مراتي أو بنتي أو أختي أو أمي تفتيش ذاتي أو حاول يقلعها هدومها علشان يفتشها؟ ج: ترفض بشدة لأن ده شرفك ولازم تحافظ عليه، والضابط أو الأمين أو أي راجل من الشرطة لو مد إيد؟

س: لازم اللي تفتش الأنثي تكون ضابطة شرطة؟ ج: مش شرط تكون ضابطة شرطة، وممكن تكون دكتورة أو ممرضة من مستشفى أو من السيدات اللي شغالين في القسم أو أي أنثي يندبها الضابط للتفتيش.

س: ممكن الضابط يندب دكتور راجل من المستشفى علشان يفتش أنثي؟ ج: يكون إجراء باطلاً لأنه لازم اللي يفتش الأنثي تكون أنثي زيها مش راجل مهما كان الوضع.

س: هل من حق الضابط يفتش شنطتها بنفسه؟ ج: من حق الضابط يفتش شنطتها ويفتحها لو كان معاه أمر بالتفتيش أو كانت متلبسة بجناية أو بجنحة عقوبتها أكثر من ٣ شهور حبس، ولو لقي فيها أي ممنوعات أو أي حاجة حيازتها تعتبر جريمة يعملها قضية ويكون إجراؤه سليماً.

س: ولو كانت الأنثي ماسكة حاجه في إيدها من حقها يأمرها إنها تفتح إيدها ويضبط اللي جواها؟ ج: من حق الضابط يأمرها بفتح إيدها، ومن حقها يفتح إيدها بالقوة بنفسه لو رفضت تفتح إيدها بمزاجها، ولو لقي فيها أي ممنوعات يعمل لها قضية لكن مش من حقها يفتشها تفتيش ذاتي أو يفتش جسمها أو يقلعها هدومها.

س: هل ممكن يتم تفتيش الأنثي أمام الضابط؟ ج: ممكن يكون شايفها وهي بتفتش ذاتي لكن بدون ما تقلع هدومها أو ينكشف مكان من أماكن عورتها.

س: أعمل إيه لو طلبت الأنثي اللي بتفتش مراتي أو بنتي إنهم يخلعوا هدومهم وهي بتفتشهم قدام الضابط؟ ج: ترفض تماماً، لأن دي تبقي جريمة هتك عرض لأن كشف جسم المرأة قدام الضابط؟

س: أعمل إيه لو الضابط أو الأمين فتش مراتي غصب عني وعنهما بالعافيه في أماكن حساسة من جسمها تمس الشرف والحياء؟ ج: لازم تعمله محضر هتك عرض ويكون معاك شهود ويتحبس الضابط أو الأمين بتهمة هتك عرض أنثي علاوة علي إن أي حاجة هيلاقها ملهاش أي قيمة لأن الإجراء اللي قام بيه بتفتيشه لأنثي باطل من أساسه وأي دليل ناتج من إجراء باطل يكون باطلاً.

س: تعمل إيه الشرطة لو كانت الأنثي مخبية أي ممنوعات جوه جسمها في مكان حساس؟ ج: مش من حق أي حد من الشرطة يخرج ممنوعات من جوه جسمها أو يلمس جسمها من أساسه لكن من حقهم يرسلوها لطبيب في أي مستشفى حكومي ويقوم الدكتور بإخراج الممنوعات بنفسه بصفته خبيراً.

~ القبض علي الناس بدون وجه حق تعرف حدود الشرطة ايه؟؟ ~

القبض علي الناس بدون وجه حق

س : تعرف حدود الشرطة إيه؟ الشرطة ليها حدود عشان تحبس حد أو تحجزه، ولو حد منها حبس مواطن بدون أمر من القاضي أو من النيابة العامة أو مكنش في حالة من حالات التلبس يبقى ارتكب جريمة وخالف القانون، ويتعاقب عليها بالحبس أو بالغرامة.

س: إيه عقوبة اللي يقبض علي حد ويحجزه بدون وجه حق؟ ج: يتحبس أو يدفع غرامة لا تزيد علي ٢٠٠ جنيه. س: هل معقول تكون عقوبة القبض علي الناس وتفتيشهم وحجزهم بدون وجه حق مجرد غرامة أقل من ٢٠٠ جنيه "يابلاش"؟ ج: هو ده القانون لكن لو تم أي تعذيب بدني للمتهم أو تم تهديده بالقتل علشان يعترف بأي شئ تبقي العقوبة السجن المشدد، لكن لو مات الشخص المقبوض عليه من التعذيب يبقى اللي موته يتعاقب بعقوبة القتل العمد.

س: لو اللي قبض عليّ طلع عامل ظابط أو لابس ملابس الشرطة؟ ج: تعمل له محضر علي طول في القسم أو المركز اللي حصلك فيها الموضوع ده لأنه بيكون ارتكب جناية في حقك ويتسجن.

س: ولو كان خد مني فلوس علشان يسييني؟ ج: خد منك فلوس أو مخدش، القبض علي الناس بانتحال صفة الشرطة جناية عقوبتها السجن المشدد، وأكد هيكون عيل من العيال الحرامية اللي.

س: يعني إيه استعمال قسوة؟ ج: استعمال القسوة استخدام عنف غير مبرر بدون داعي علشان يؤلم الناس في شرفهم أو جسمهم مهما قلت درجته.

س: إيه عقوبة استعمال القسوة؟ ج: كل موظف أو مستخدم عمومي أمر بتعذيب متهم أو فعل ذلك بنفسه لحمله علي الاعتراف يعاقب بالسجن المشدد أو السجن من ثلاث سنوات إلي عشر وإذا مات المجني عليه يحاكم بالعقوبة المقررة للقتل عمداً.

س: حتي لو كان معذبش بنفسه؟ ج: كل موظف أو مستخدم عمومي أمر بتعذيب متهم أو فعل ذلك بنفسه لحمله علي الاعتراف يعاقب بالسجن المشدد أو السجن من ثلاث سنوات إلي عشر وإذا مات المجني عليه يحاكم بالعقوبة المقررة للقتل عمداً

~ الكمين لمين؟ ~

س: يعني إيه كمين؟ ج: المفروض إن مفيش حاجة اسمها كمين للناس، لأن الكمين بيكون للأعداء وإحنا لسنا أعداء للشرطة، لكن اللي بنشوفه بالليل اسمه لجنة لحفظ الأمن والنظام في الشارع

واللي سماه كمين هم الحرامية وميصحش أبدا إن حد يقول إن الشرطة عاملة كمين للناس.

س: إيه فائدة اللجان اللي بتكون في الشوارع بالليل في كل حطة؟ ج: اللجان بتكون متكونة من ظابط القسم، وظابط مرور، وظابط مباحث ومعاهم بوكس وأمناء شرطة وعساكر لحفظ الأمن والنظام في الشارع، لضبط المتهمين الهاربين من الأحكام وأي حاجة تمس الأمن العام وضبط المخالفات المرورية.

س: علي أي أساس بيوقفوا الناس ويسيبوا ناس تانية بدون توقيفهم أو حتي سؤالهم؟ ج: ظابط المباحث اللي في اللجنة بيكون عارف كتير من المجرمين والمسجلين في دايرة قسمه، وبيكون باين...؟

س: هل من حق الظابط يقبض علي شخص لمجرد عدم وجود رخصة قيادة معاه؟ ج: عدم حمل رخصة القيادة لا تبيح للظابط القبض أو التفتيش لكن من حقه يسحب رخصة التسيير فقط بشرط تكون السيارة باسم قائدها ومعاه تحقيق شخصيته، ويقوم الظابط بإعطائه إيصال سحب لمدة أسبوع.

س: ولو كان مع الشخص رخصة قيادة لكن بدون رخصة تسيير للسيارة؟ ج: من حقهم يسألوا عن رخص التسيير، ولو كانت السيارة بدون رخصة تسيير...؟

س: هل من حقهم يطلبوا البطايق الشخصية؟ ج: من حقهم يطلبوا بطايق الناس عشان يتأكدوا من شخصياتهم ولو شكوا في حد ممكن يوقفه علي جنب بدون ما يركبه البوكس أو يفتشه ويستعلموا عنه من القسم باللاسلكي اللي معاهم إذا كان مطلوب أو عليه أحكام ولا لأ.

س: ومين اللي من حقه يطلب البطاقة أو الرخصة؟ ج: الظابط أو أمين الشرطة والمخبر والعسكري من حقهم يطلبوا الرخصة فقط لتوصيلها للظابط، لكن اللي من حقه يسحب التراخيص لازم يكون ظابط المرور بنفسه ويعطيك وصل بالسحب لكن مش من حق الظابط أو غيره إنه يسحب الرخص بدون وصل سحب تراخيص.

س: هل من حق اللجان توقيف السيدات والبنات من قاندي السيارات ؟ ج: من حقهم توقيف أي سيدة أو فتاة في اللجنة وسؤالها عن التراخيص مثل الرجال، ولو كانت أي واحدة بدون رخصة من حقهم سحب الرخصة الثانية وإعطائها وصل بسحب الرخصة.

س: هل من حق اللجنة سؤالي عن سيدة أو بنت جالسة جنبي في سيارتي وسؤالها عن بطاقتها؟ ج: من حقه سؤالها فقط عن بطاقتها للتعرف علي شخصيتها وممكن يستعلم عنها بالجهاز من القسم لو شك إنها مطلوبة في حكم أو عليها أمر ضبط وإحضار لأن زي ما فيه مجرمين ومتهمين من الرجال فيه أيضا متهمين ومجرمين من النساء وبيكون عليهم أحكام واجبة التنفيذ عليهم.

س: أعمل إيه لو الظابط سألني مين اللي معاك ؟ ج: قوله بكل بساطة زوجتي أو خطيبتي أو صديقتي ومن حقي الخروج مع صديقتي في أي وقت.

س: هل من حقه ينزلها من سيارتي ويخدها علي جنب بعيد عني ويسألها عن أي حاجة أو يفتشها؟ ج: مش من حقه ينزلها مطلقا من السيارة طالما غير مطلوبة في شئ أو معروفة لديه من قبل أو مسجلة، وميقدرش أي ظابط مهما كانت رتبته يفتش أنثي تفتيش ذاتي حتي لو كانت متهمة في مليون قضية.

س: ليه بنشوف بعض اللجان بتنزل البنات من التاكسيات ويخدوهم ع القسم وخصوصا في شارع الهرم وجامعة الدول؟ ج: فيه بنات كتير بيكونوا مسجلات آداب ودعارة وعليهم أحكام وبيكونوا معروفين للظباط .

س: أعمل إيه لو الظباط طلب مني أنزل من السيارة علشان يفتشها أو طلب مني أفتح الشنطة؟ ج: مفيش حاجة اسمها تنزل من سيارتك علشان يفتشها إلا لو كان معاه أمر من النيابة أو المحكمة بتفتيشك أو كنت في حالة تلبس بجريمة أو كانت ريحة السيارة تدل أن حد كان بيشررب فيها مخدرات مثلا، وترفض تفتح شنطة عربيتك وتقول للضابط "أفتح شنطتي ليه مادام رخصي سليمة وسيادتك شايف إني مش محل شك والعربية ملكي وفتح الشنطة ده اسمه تفتيش وده محتاج إذن من النيابة، وأنا مش ممسوك لا في حالة تلبس ولا أنا حرامي وأنا عارف إنك راجل قانون وعارف الإجراءات كويس وعارف إنك مش ممكن تخالف القانون.

س: ليه الضباط ساعات بينزلوا الشباب اللي راكبين في العربيات ويطلبوا منهم يقولوا "حاحا"؟ ج: علشان يعرفوا لو كان اللي سايق شارب أي كحوليات أو لا، علشان بيكون ريحة فمه واضحة لما يقول "حاحا" وبيان إذا كان شارب كحوليات ولا لا .

س: ليه الظباط بيكونوا واقفين بعيد مع بعض ويبيعتوا الأمانا والعساكر تسحب التراخيص؟ ج: مش من حق الأمين أو المخبر أو العسكري يسحب رخصك، والأفضل تركن العربية وتنزل للظباط بكل ذوق وتوريه الرخص وتقوله أنا عارف إن سيادتك فقط اللي من حقه يشوف رخص العربيات مش الأمين أو العسكري.

س: ولو أخذني علي القسم أو ركني جنبه في الكمين؟ ج: لازم تتصل بحد من أهلك أو محاميك وتصمم تعمل له محضر في القسم بالواقعة اللي حصلت معاك وإنك اتقبض عليك في اللجنة بدون وجه حق وتصمم علي اتخاذ إجراء مع الظباط ومتنازلش عن حقك .

س: من حق الظباط يركني جنبه في الكمين وقت قد إيه علشان يستعلم عني من القسم؟ ج: وقت بسيط ميزدش عن نصف ساعة فقط، لأن مصالح ووقت الناس ليهم تمن ومش لعبة.

س: لو كنا راكبين ميكروباص وفي الكمين نزلوا الناس اللي فيه علشان يفتشوهم؟ ج: متوقفش إن حد يفتشك وترفضوا أي تفتيش، لكن من حقهم يشوفوا البطاقات فقط ويتحروا عن اللي شاكين إن عليهم أحكام أو مطلوبين في قضايا.

س: ليه بنشوف الأمناء والظباط بيكشفوا كتف بعض الناس في اللجان؟ ج: بيكشفوا كتف اللي بيشتبها فيه علشان يعرفوا إذا كان سوابق ومسجل ومختوم علي كتفه إنه مسجل خطر ولا لا .

س: يعني إيه مسجل خطر؟ ج: يعني شخص معتاد الإجرام واتمسك في قضايا سرقة أو بلطجة وفرض إتاوت أو بيشغل في تجارة المخدرات أو الدعارة أو فرد في عصابة.

س: ولية المسجل خطر بيبكون الشرطة ختماه علي كتفه؟ ج: من فترة طويلة كانت الشرطة بتختتم المسجلين خطر علي كتفهم علشان تعرفهم، والمسجلين أنفسهم وأصحاب السوابق اللي متعودين علي الحبس والسجن بيدقوا وشم علي جسمهم وهم موجودين في السجون

~ تعمل إيه لو جالك بوليس البيت وقالك البيه المعاون عاوزك في القسم؟ ~

س: أعمل إيه لو حد من الشرطة جالي البيت وقاللي البيه المعاون عايزك في القسم؟ ج: مفش حاجه اسمها البيه المعاون ف القسم، لازم يدبك ورقة مكتوب فيها طلب حضور أو طلب استدعاء للقسم.

س: يعني إيه طلب حضور للقسم؟ ج: طلب الحضور للقسم هو طلب من ضابط في القسم عشان تروح القسم يسألك في محضر حد شاكيك فيه، أو لسؤالك عن معلوماتك في جريمة حصلت.

س: إيه شكل ورقة طلب الحضور للقسم؟ ج: هي ورقة طالعة من القسم مطبوعة علي نموذج ويمكن تكون مكتوبة بخط اليد لمقابلة ضابط في القسم أو في المركز أو في النقطة بخصوص الرد علي محضر أو شكوي أو بلاغ.

س: طلب الحضور للقسم بيبكون مختوم ولا لا؟ ج: طلب الحضور دايماً بيبكون بدون ختم.

س: لازم أروح للقسم مع الشخص اللي جاب لي طلب الحضور؟ ج: إنت حر تروح أو متروحش في طلب الحضور للقسم، لكن حاول تعرف إنت مطلوب في إيه قبل متروح للقسم في طلب الحضور.

س: أعمل إيه لو اللي جابلي طلب الحضور طلب مني بطاقتي يخدها معاها عشان يضمن إني أروح القسم؟ ج: مفيش حد من حقه يسحب بطاقتك أو يخذها ضماناً عشان تروح القسم وارفض تديله بطاقتك.

س: لو مروحتش في طلب الحضور، ممكن يخذوني ع القسم بالعافية؟ ج: ميقدرش حد يخذك في طلب الحضور للقسم بالعافية أو يقبض عليك بالقوة.

س: إيه المسؤولية لو مروحتش القسم في طلب الحضور؟ ج: مفيش مسؤولية عليك لو مروحتش القسم في طلب الحضور، لكنهم هيبعتو المحضر للنيابة، ولو النيابة شايفة إنه لازم حضورك هتبعثك طلب حضور للنيابة.

س: أعمل إيه لو جالي طلب حضور م القسم واللي جاييه كان مصمم يخذني معاها؟ ج: من حقت متروحش معاها في نفس الوقت، لأنك حر تروح أو متروحش، ويمكن تستلم الطلب من الشخص اللي جايب لك طلب الحضور للقسم، والأفضل إنك تبعت الأول محامي يكون معاها توكيل منك يعرف إيه الحكاية قبل متروح القسم في طلب الحضور.

س: وليه أبعت محامي؟ ج: علشان يعرف إنت مطلوب في إيه قبل م تروح القسم، لأنك لو رحت بنفسك القسم الصبح بدري في طلب الحضور وكان فيه حد شاكيك في محضر هيخدوا أقوالك في المحضر ويبعتوك علي النيابة، لكن لو رحت القسم بالليل ممكن يبيتوك ليلة في الحجز ويبعتوك ع النيابة تاني يوم.

س: المفروض أعمل إيه في الحالة دي؟ ج: تبعت محامي معاه توكيل عنك يعرف إيه الموضوع ويرد بدل عنك في المحاضر.

س: لازم يكون مع المحامي توكيل مني علشان يرد عني في المحاضر؟ ج: لازم يكون للمحامي توكيل قضايا عنك علشان يقدر يعرف إيه الموضوع ويقدر يرد علي المحضر، لأنهم في القسم مش هيعرفوه أي حاجة عن المحضر لو مفيش معاه توكيل.

س: إيه هو توكيل المحامي وببطلع منين؟ ج: توكيل المحامي بكون توكيل في القضايا فقط، وببطلع من أي شهر عقاري خلال ساعة.

س: لو حد معاه توكيل عام عني يقدر يحضر للقسم ويرد علي المحاضر بدلاً مني؟ ج: مكش حد غلب، لازم يكون محامي ومعاه توكيل عنك في القضايا فقط.

س: من حقي يحضر معايا المحامي في القسم؟ ج: يجوز لمحاميك إنه يحضر طلب الحضور للنياية سواء كنت متهم أو شاهد.

في طلب الحضور للقسم أنت حر تروح أو ما تروحش بس مهم تعرف إنت مطلوب في إيه وبرضه أنت حر في طلب الحضور للنياية لكن لو مارحتش تقدم عذر مقبول.

س: أعمل إيه لو جالي طلب حضور من النياية؟ ج: المفروض تروح للنياية لو مفيش عندك عذر مقبول تقبله النياية العامة أو ممكن تبعت محامي معاه توكيل عنك علشان يعرف إيه الموضوع ويرد علي المحاضر بذلك.

س: الشخص اللي بييجب طلب الحضور للنياية ممكن ياخدني ع النياية بالعافية؟ ج: مش من حق حد يخذك بالعافية أو بالقوة في طلب حضور للنياية.

س: هو بيسلمني صورة من طلب الحضور للنياية؟ ج: لازم يسلمك صورة من طلب الحضور للنياية ويكون متحدد فيه ميعاد ومكان الحضور وهتقابل مين من أعضاء النياية.

س: إيه الفرق بين طلب الحضور للقسم وطلب الحضور للنياية وأمر الضبط والإحضار والإعلان من المحكمة بالحضور لجلسة؟ ج: طلب الحضور للقسم إنت حر تروح أو متروحش بس المفروض تعرف إنت مطلوب في إيه قبل ما تروح لأن لو مروحتش هيبعتوا المحضر من القسم للنياية، أما طلب الحضور للنياية إنت حر تروح أولا....؟؟؟

~ تفتيش عربيتك له قواعد وأصول.. إوعي الشنطة! ~

س: أعمل إيه لو كنت ماشي بعربيتي والشرطة وقفتني وطلبت أفتح شنطة عربيتي؟ ج: مش من حق الشرطة تفتش شنطة عربيتك بدون إذن تفتيش وأرفض تفتح شنطة عربيتك لأي حد مفيش معاه إذن تفتيش ليك أو لسيارتك.

س: من حق الشرطة تفتيش صالون سيارتي الخاصة؟ ج: مش من حق الشرطة تفتيش السيارات الخاصة بغير إذن من النيابة العامة أو من المحكمة أو في غير أحوال التلبس بجريمة أو بدون رضا أصحابها، أو حتي فتح أبواب السيارة.

س: لو كنت راكب داخل عربيتي من حقهم يفتشوها؟ ج: مش من حقهم.

س: لو كنت راكب قطر أو أتوبيس من حق حد يفتشني أو يفتش شنطتي؟ ج: من حق الشرطة يفتشوا القطر أو الأتوبيس بس مش من حق حد يفتشك أو يفتش شنطتك إلا بإذن من النيابة طالما كانت شنطتك معاك، لكن لو الشنطة جانبك وسألك دي شنطتك وقلت له إنها مش شنطتك يبقى من حق الظابط أو الأمين يفتشها علي أساس أنها ملهاش صاحب.

س: ليه الشرطة بينزلوا الناس من الأتوبيسات ويفتشوهم ويفتشوا شنطهم وهم مسافرين الغردقة أو شرم الشيخ مثلاً؟ ج: ده إجراء مش قانوني وفيه تجاوز شديد واعتداء علي حرية الناس وحرمتهم، ولازم ترفض التفتيش إلا بإذن من النيابة أو إذا كان فيه حالة تلبس أو كنت موافق علي التفتيش بمزاجك.

س: لو عربيتي مقفولة وراكنها تحت البيت هل من حق حد يفتشها؟ ج: مش من حق حد يفتشها إلا بإذن من القاضي أو من النيابة.

س: ولو عربيتي كانت في جراج جوه بيتي؟ ج: في الحالة دي لازم تفرق بين جراج تحت عمارة ممكن أي حد يدخله يبقى من حقهم يفتشوها، لكن لو كانت في جراج جوه بيتك يبقى لازم أمر تفتيش للبيت لأن الجراج الملحق للبيت يعتبر له نفس حرمة وشروط تفتيش البيوت.

س: معقول حد في القسم هيوافق يعمل محضر هتك عرض ضد ظابط مباحث شغال فيه؟ ج: لازم تتمسك بحقك، ولو رفضوا يعملوك محضر تطلع علي المديرية وتقابل مفتش الداخلية وتروح تعمل له محضر في النيابة

~ حد يفتشك او يفتش بيتك ~

الحرية الشخصية للناس حق طبيعي مصان لا يُمس، ولا يتم القبض ولا تفتيش ولا حبس ولا تقييد حرية الناس ومنعهم من التنقل من مكان لمكان إلا بأمر من القاضي المختص أو من النيابة العامة ماعدا في حالات التلبس.

س: يعني إيه تفتيش؟ ج: التفتيش إجراء من إجراءات التحقيق اللي .

س: أعمل إيه لو حد قاللي إن معاه إذن بتفتيشي؟ ج: لازم تمسك أعصابك ومتترعش وتتمالك نفسك لمدة خمس دقائق فقط، وتتاكد الأول من شخصيته، وتطلب تشوف إذن التفتيش اللي معاه ولازم تتأكد من حاجات أساسية جدا في الإذن.

س: هو الظابط هيرضي يوريني الإذن؟ ج: من حقك تشوف كارنيه اللي بيفتشك والإذن اللي معاه

ولازم تقراه كويس جدا، وده حقك ولازم تتمسك بيه، ومتخلّش حد يفتشك إلا بعد ما تشوف الإذن وتتأكد إنه سليم وساري المفعول، وميكونش الإذن باطل أو منتهي المدة.

س: من حق الشرطة تفتيش المقبوض عليه؟ ج: في كل الأحوال اللي يجوز فيها القبض علي المتهم بيجوز فيها تفتيشه، لكن لو كان المقبوض عليه أنثي لايجوز تفتيشها إلا بمعرفة أنثي زيها.

س: والشرطة بتكلّش اللي بيتفتش؟ ج: من حق الشرطة تسيطر علي الشخص اللي بيتفتش وتحد من حركته وحريته بالقدر اللازم فقط علشان تقدر تقوم بالتفتيش وميعطلش إجراءات التفتيش أو يرمي حاجة أو يهرب أو يعتدي علي حد من الشرطة أو الناس الموجودين في المكان.

س: هل بيكون منصوص في إذن التفتيش علي القبض؟ ج: مش شرط يكون إذن التفتيش فيه أمر صريح بالقبض علي المتهم المأذون بتفتيشه.

س: وإيه الحاجات اللي لازم أتأكد منها في إذن التفتيش؟ ج: لازم تتأكد من حاجات أساسية في إذن التفتيش وهي:

< لازم يكون الإذن مكتوب مش شفوي ويكون مبني علي تحريات جديّة. > الإذن يكون عن جنائية أو جنحة حصلت بالفعل مش لسه هتحصل في المستقبل، ويكون فيه دلائل كافية علي إن المتهم المأذون بتفتيشه هو اللي ارتكبها. < يكون الإذن صادر من النيابة المختصة أو من قاضي التحقيق المختص ويكون الإذن في دايرة اختصاصها. > يكون اللي بينفذ التفتيش معاه سلطة الضبطية وفي دايرة اختصاصه مش خارجها. > لو كان الإذن طالع لتفتيش بيت لازم يكون الإذن مكتوب فيه سبب التفتيش، وطبيعة الجريمة اللي بيتفتش البيت بسببها. > لازم وفي أغلب الأحوال يكون الإذن مكتوب مش شفوي ومتقبلش إنه يقولك إن الإذن نسيه في القسم أو هتشوفه بعد ما يفتشك. > لازم يكون الإذن موقع بخط يد مصدره، وواضح فيه اسمه ووظيفته ولو كان الإذن مش موقع يبقى باطل وكأنه غير موجود من أساسه. > لازم يكون الإذن واضح وصريح إنه إذن تفتيش مش مجرد سؤال متهم أو استيفاء لمحضر. > لازم يكون محدد في الإذن الاسم الحقيقي أو اسم الشهرة للشخص المطلوب تفتيشه أو للأشخاص والأماكن المأذون بتفتيشها، ومبين فيه نوع الجريمة المطلوب التفتيش لكشفها. > لازم يكون واضح في الإذن إيه اللي مطلوب تفتيشه بالضبط يعني مكتوب فيه لو كان مطلوب تفتيش المتهم فقط أو تفتيش المتهم وعريبته، أو المتهم ومكتبه، أو ١ > لازم تشوف وقت صدور إذن التفتيش والمدة المذكورة فيه، ولازم تكون مدة الإذن محددة مش مفتوحة علي طول، ولو كان مش مذكور وقت ويوم صدور الإذن يبقى باطل. > ميكونش حد نفذ نفس الإذن عليك قبل كده، لأن إذن التفتيش ميصالحش للتفتيش غير لمرة واحدة فقط.

س: مين اللي من حقه يقوم بالتفتيش؟ ج: من حق النيابة وقاضي التحقيق والظباط والأمناء والصولات وشيوخ الخفر، يعني من حق الشرطة اللي ليهم سلطة الضبطية فقط، لكن دايمًا اللي بيفتشوا بيكونوا من ظباط المباحث.

س: هل بيكون مكتوب في الإذن اسم الظابط اللي بيفتش؟ ج: مش لازم يكون مكتوب في الإذن اسم الظابط اللي بيفتش، ومن حق الظابط يستعين بزمايله لمساعدته في التفتيش حتي لو كان ملهمش سلطة ضبطية، لكن لو كان الإذن طالع باسم ظابط محدد بالاسم، فلا يجوز ليه ندب غيره لتنفيذ التفتيش مادام الإذن مش عاطيه الحق في ندب غيره.

س: اللي بيقوموا بتنفيذ إذن التفتيش من الشرطة بكونوا لابسين ميرى ولا ملكى؟ ج: ممكن يكونوا لابسين ميرى وممكن يكونوا لابسين ملكى، وممكن يكون بعضهم لابس ملكى ومعاهم ناس لابسين ميرى، ومتفرقش ميرى ولا ملكى، المهم تتأكد من شخصيتهم ويكونو شرطة ومعاهم إذن تفتيش سليم مش نصابين وعاملين عليك ظباط وعاوزين يقشطوك ويقلبوك.

س: هل من حق العساكر والمخبرين ومناديب الشرطة تفتيش الناس؟ ج: العساكر والمخبرين ومناديب الشرطة مش من حقهم التفتيش علشان ملهمش سلطة الضبطية.

س: ولو كان اللي بيفتش البيت مندوب أو عسكري لكن معاهم ظابط وكانوا هما اللي بيفتشوا مش الظابط؟ ج: الظابط من حقه يستعين بالناس اللي شغالين معاه فى التفتيش بشرط يتم التفتيش تحت رقابته وإشرافه، لكن لو تم التفتيش فى غير حضور الظابط وبدون إشرافه يكون التفتيش باطل لأن مش من حق المناديب وعساكر الشرطة التفتيش لوحدهم.

س: هل ممكن وكيل النيابة يقوم بالتفتيش بنفسه؟ ج: من حق وكيل النيابة يفتش بنفسه، لكن جرت العادة إن النيابة والمحكمة بيندبو ظباط المباحث للتفتيش، ولو نزلت النيابة تفتش بنفسها يكون معاهم قوة من الشرطة علشان تأمن المأمورية وتأمين المكان.

س: لو النيابة قامت بالتفتيش هل يكون مع وكيل النيابة إذن التفتيش؟ ج: ممكن وفى كثير من الأحوال يكون معاه إذن التفتيش .

س: إيه شكل إذن التفتيش؟ ج: إذن التفتيش بكون مكتوب بخط اليد وموقع من وكيل النيابة أو من قاضي التحقيق ويكون مختوم بختم النيابة وأحياناً بكون بدون ختم، والقانون محدش له شكل معين.

س: وفين بيتم تنفيذ الإذن بالتفتيش؟ ج: بيتم تنفيذ إذن التفتيش فى أى مكان، المهم يكون فى دائرة اختصاص النيابة أو المحكمة اللي مطلعاه ودائرة اختصاص اللي بينفذه.

س: أعمل إيه لو الإذن بالتفتيش كانت مدته منتهية؟ ج: من حقه ترفض التفتيش علشان لا يجوز التفتيش بإذن تفتيش منتهى المدة، وأي دليل ينتج عنه ملهوش أى قيمة لو كان الإذن انتهى ومتجددش لمدة ثانية من النيابة أو المحكمة.

س: هل ممكن إذن التفتيش يتجدد لمدة ثانية؟ ج: إذن التفتيش ممكن يتجدد من النيابة أو المحكمة لمدة ثانية، ولو تم تجديده يجوز التفتيش بيه.

س: إزاي بتتسبب مدة الإذن بالتفتيش؟ ج: يوم صدور الإذن غير محسوب من المدة، وبتتسبب مدة الإذن ابتداء من اليوم التالى لصدوره.

س: هل ممكن أفتش بإذن تفتيش واحد أكثر من مرة؟ ج: الإذن بالتفتيش زي عود الكبريت مصلحش للتفتيش غير لمرة واحد فقط.

س: إزاي بيتم تنفيذ إذن التفتيش؟ ج: القانون محدش طريقة معينة لتنفيذ إذن التفتيش، وترك طريقة التفتيش لتقدير المكلف بالتفتيش، وأعطى له الحق إنه يستعين برجالته ومعاونيه فى عملية التفتيش بحيث يكونو على مرأى منه وتحت إشرافه.

س: لازم اللي بيفتش يدخل من الباب ولأ ممكن يدخل من أي مكان؟ ج: من حق اللي بيفتش يدخل من أي مكان وممكن يدخل من الشباك أو من السطوح أو من البلكونة.

س: من حق اللي بيفتش يستخدم القوة في التفتيش؟ ج: من حق اللي بيفتش يستخدم القوة بالقدر المناسب علشان يسيطر علي المكان، ويقيد حرية الشخص اللي بيفتشه من غير ما يعرض حياته أو سلامته للخطر.

س: من حق الظابط اللي بيفتش يخرج أي ممنوعات من أماكن عورة المتهم؟ ج: يبقي ارتكب جريمة هتك عرض سواء كان المتهم اللي بيتفتش راجل أو أنثي.

س: هل ضروري يكون الشخص اللي بيتم تفتيش بيته موجود وقت تنفيذ التفتيش؟ ج: لا مش لازم يكون الشخص المتهم المأذون بتفتيشه موجود وقت إجراء التفتيش.

س: لازم يكون إذن النيابة مع الظابط اللي بيفتش؟ ج: في بعض الأحوال النادرة ممكن التفتيش بدون ما يكون مع الظابط اللي بيفتش الإذن في إيدته وقت التفتيش لكن ده بيكون في أضيق نطاق ممكن، ولازم يكون الإذن مكتوب وله أصل في أوراق القضية اللي بيتحقق فيه

~ طلب الحضور للنيابة ~

س: إيه هو طلب الحضور للنيابة؟ ج: هو طلب شخص للحضور للنيابة في وقت محدد .

س: إيه الضرر لو جاني طلب حضور للنيابة ومروحتش؟ ج: مفيش مسئولية عليك لكن لو مروحتش ومقدمتش عذر تقبله النيابة، يطع لك أمر ضبط وإحضار وتنفذه عليك الشرطة أو تقبض عليك المباحث، وتوديك للنيابة مقبوض عليك.

س: إيه شكل ورقة طلب الحضور للنيابة؟ ج: دي ورقة طالعة من النيابة للحضور لمقر النيابة عضو من أعضاء النيابة لسؤال شخص في محضر أو الإدلاء بالشهادة.

س: أعرف ازاى إذا كنت متهم ولا مطلوب للشهادة؟ ج: بيكون مكتوب علي طلب الحضور إذا كنت متهم ولا شاهد.

~ فيه تفتيش اسمه باطل ومتجاوز للحدود.. تحب تعرفه؟ ~

س: يعني إيه تفتيش باطل؟ ج: يعني تفتيش تم في غير الأحوال اللي صرح بيها القانون، وأي دليل ينتج من تفتيش باطل مالوش أي لازمة لأن ما بني علي إجراء باطل بيكون باطل، والمحكمة بتستبعد من أساسه أي شهادة للظابط اللي بيقوم بإجراء باطل ضد المتهم.

س: إيه اللي يبطل التفتيش؟ ج: إن التفتيش يتم بعد تاريخ الإذن بالتفتيش أو يكون وكيل النيابة مش موقع عليه، أو مفيش تاريخ مكتوب عليه، أو لو كان طالع إذن التفتيش باسم ظابط معين يبقي مينفعش غيره يعملته أو يتم التجاوز عن حدود الإذن أو كان فيه تعسف في تنفيذ التفتيش.

س: لو الظابط لقي الحاجة اللي حضر علشان يفتش عنها في إذن التفتيش هل من حقه يفتش
عن حاجات ممنوعة ثانية؟ ج: لو الظابط لقي الحاجات اللي حضر علشان ينفذ الإذن بالتفتيش
عليها مش من حقه يفتش عن حاجات ثانية.



*ملاحظات هامة :

في بعض الأجزاء من الكتاب للأسف مش كاملة...محبتيش أني أكملها بنفسني فوضعت نقاط في
مكانها لحين حصولي على نسخة أصلية من الكتاب وسحبه على الأسكاتر

هذا الكتاب من تأليف العميد السابق : عمر عفيفي

الذي اضطر للسفر الى أمريكا حفاظا على حياته بعد تهديدات وصلته من الداخلية وتحذير بعض
أصدقائه له بنية الداخلية على أسكاته بأي ثمن

ومصادرة جميع نسخ الكتاب من مكتبات مصر

محدود الدخل

<http://no4israel.blogspot.com>

<http://documovies.blogspot.com>

<http://www.eibda3.com/vb/index.php>

في أمان الله

...